

ديوان شعر

منايا

عمر جابر

"منايا"

بحلم اغني  
تسمع غنايا  
و لمين اغني  
لغير منايا  
رغم الفراق  
دايما قريبة  
و ازاي قريبة  
و مش معايا  
أصل الحكاية  
كل الحكاية  
يوماتي بكتب  
غنوة وقصيدة  
عن ذكرى حلوة  
عايشة معايا  
حببتها ايوه  
و دي الحقيقة  
هي منايا  
اجمل حكاية

"ياريت انساك"

بكون وياك

وتوحشني

وتنساني

وبستناك

تصالح قلبي من تاني

ياريت انساك

انا ناسية معاك حالي

معاك برتاح

ومش عارفة انا مالي

ومن قلبي انا رايداك

وفي عيوني بتحلالي

سايب روعي بتجري وراك

تنادي عليك بصوت عالي

ناسيني ليه انا فاكراك

حبيبي ليه بتنساني

انا عايشة على ذكراك

ومش عارفة اعيش تاني

## "زي القمر"

جاني القمر عندي  
يسهر معايا الليل  
يمشي على دربي  
صبره وباله طويل  
يا أهل الهوى قلبي  
دايب بقاله سنين  
هو اللي شال ذنبي  
يا أهل الهوى شاهدين  
هو اللي جه عندي  
زي القمر شايفين  
زي السما بيبكي  
مطرة وشوق وحنين  
زي الكمان يحكي  
غنوة بقالها سنين

"كان زمان"

لسه فاكر

ايوه فاكر

ذكرى كانت من زمان

الحقيقة صعبة لكن

صعب انسى اللي كان

كل يوم بكتب مشاعر

صعب اوصفها بكلام

ذكرياتك في الخواطر

في الجيتار والكمان

ذكرياتك في الاماكن

اللي شاهدة ع الغرام

لسه فاكر

ايوه فاكر

لسه بتمناكي لكن

شعري شاب من زمان

## "الحكاية"

الحكاية بنت حلوة  
في عيونها الزرقة غنوة  
قلبي داب يادوب بنظرة  
والفصول كتبت رواية  
م الطفولة صرت شاعر  
والقدر كتب المشاعر  
قلت فيها غنوة حلوة  
قلبي قال يعزف ورايا  
قلبي كان غصن اخضر  
بالزمن ورده بيكبر  
من هنا بدأ المسلسل  
لحن كان تتر البداية  
هي بطلة كل حلقة  
والسيناريو في ألف ورقة  
كل كلمة بتقول بحبك  
والنهاية  
مفيش حكاية  
هي دي كل الحكاية

"ليه حبيت"

كل اللي قالوا خلاص  
سابتك أعز الناس  
نسيوا يا قلبي عينيك  
صوتي وانا بناديك  
سببت الكلام والناس  
وجريت بلهفة عليك  
ناسية يا قلبي الناس  
كل العيون حواليك  
قلبي انجرح و انداس  
ساعة ما قال حبيت  
ساعة ما قال احساس  
مليان حنين وياريت  
سمع كلام الناس  
نساك  
وياريتة نسيك

"عجيب يا هوى"

طير الهوى مجروح  
والعش لسه بعيد  
دمعه اللي سال بيروح  
وتعب من التنهيد  
رد الحمام بالنوح  
فين اللي كان تغريد  
فين اللي كان بيروح  
يعود وشايل عيد  
شايل عيدان ووعود  
يبني العشش ويزيد  
كل الجراح بتروح  
وجرحك يا طيري عجيب

"فراق الحبيب"

والشمس بتغيب

قال الحبيب

خلاص مسافر

في دربي وحيد

معلش يمكن

بعد السنين

وعشرة زمن

مكتوب اسيب

كل اللي كان

لكن هسيب

ذكرى تعيش

مليون حكاية

وسط الكلام

بلاش دموع

ولا وداع

انا مسافر

لاجمل مكان

## "القصيد"

القصيد لسه شاهدة  
ع الليالي والعذاب  
الف كلمة والف شمعة  
نورها ضيه ذكريات  
رغم انك سيبتي نورك  
في ليالي الغياب  
في كل كلمة  
وكل دمعة  
رافضة تنزل من سكات  
وانا واقف بالكمنجة  
ببكي لحن م العذاب  
بكتب غنوة  
ذكري حلوة  
لحن يتغنى عتاب  
القصيد لسه فاكرة  
شاهدة لسه ع الغياب

## "كازانوفا"

لو فاكِر نفسك كازانوفا  
وبنات بتحبك بعيوبك  
باكينام وشاهنده مع وردة  
واليوم الثاني مع نوبا  
دا الواتس شاهد على يسرا  
والفيس شاهد على نورا  
في رسايل مليانة حسرة  
من بنت كانت من لوناك  
كوتشينة اوراقها بصره  
وبتلعب بيها من يومك  
بكرة تتجوز يوم واحدة  
تسال ع الماضي ودفاتره  
هتقول لك حبيت مين قبلي  
دي بنات من بحري ومن قبلي  
هتقول دا ماضي وياريتني  
ما عرفت شاهنده أو نوبا  
أنا عمري ما كنت كازانوفا

"ياللي بتسأل"

ياللي بتسأل

بعد غياب

راجع ليه

بغزل وعتاب

بعد ما قلبك

قال لي وداع

لسه بتسأل

ع الأسباب

رد الباب

اسأل هجرك

شوف هيقول لك

ايه الرد

ابعد هاجر

خليك فاكر

مهما تحب

قلبك طير

من غير أرض

"افترقنا"

افترقنا

وسط بحر موجه ثار

و انتي بتقولي فراق

خلاص ما بينا ألف سور

سيينا كل الذكريات

في فيلم عدى وعمر فات

الكلام ما بينا مات

حتى من غير الدموع

افترقنا من سكات

"على فين يا هوى"

على فين يا هوى

على فين رايحين

دا الشط هوى

والبحر حنين

لا البحر ارتوى

ولا احنا قادرين

ننساك يا هوى

يا سنين سالكين

أولها شوق

وأخرها حنين

"كلام مكمش"

كتاب القلب مفتوح  
وكل سطره مكتوبة  
وناس شايفة كلام مجروح  
ومين في الحب متعلمش  
ومين دايب ومتعذبش  
انا عايش بس عشانك  
ولو غايبة  
بسبب الدنيا في غيابك  
عشان سايبة  
سنين حلوة  
كلام مكمش  
دا حبك يا قلبي خلاني  
احب الدنيا عشانك  
ومستسلمش

"ذكريات"

صدقي في المعجزات

احلمي حلم اتنسى

رجعيني لذكريات

يوم لقانا من زمن

عمر عدى

عمر فات

حب ساب في قلبي ضي

رغم انه ماضي مات

بس برضه لسه حي

ناسي فرق التوقيتات

صعب انسى الذكريات

قلبي عاشق

ماضي مات

## "اخبار اليوم"

مفـيش عنوان في الأهرام  
يقول اليوم صدر فرمان  
عزلنا الشوق والأحلام  
عزلنا كثير من الاعذار  
سنين بنقول هنتغير  
اتاري عمرنا قصير  
ولا نافع يكون نافع  
ولا فاضل عقاد نافع  
يقول ع الحب يتغير  
نعيش العمر بنهايه  
وان صابنا بنتحير  
قضاء من ربنا مُسير

## "ضي القمر"

وضي القمر بيروح

سر العيون ببويوح

قصة حياة عشاق

عاشوا حمام بينوح

درب العيون اشواق

سر الغرام في الروح

اخر سهرنا فراق

وضي القمر بيروح

## "معبد العشاق"

كل العشاق سياح  
ببوزوروا المعبد سياح  
وأنا قاعد فيه بتعبد  
وبصلي وسط الرهبان  
أول أصنام المعبد  
أغنية خلقت أشجان  
آخر أصنام المعبد  
أبيات صارت أوهام  
توب منسوج بالذكري  
في عيوني غربة وأحلام  
كل الأحزان على فكرة  
غربة بتتاجي أوطان

"ساعات"

ساعات وساعات

يغلبني هواك

واشوف الطيف

احلم بالضيف

يملا لي البيت

لحظات اوقات

يا نسيم الصيف

من بعد خريف

من بعد هوان

عز زني هواك

من كل العمر

ايامي ساعات

وساعات العمر

تضيع وياك

"يا جميل"

بفلاش الكاميرا  
على شط النيل  
صورتك صورة  
مليانة حنين  
ولقيتني بقرب  
منك يا جميل  
وانت بتستغرب  
يا ابو رمش كحيل  
حبيتك امتى  
معرفش ازاي  
يا كمنجة و غنوة  
وبيانو وناي  
وسهرنا السهرة  
على نغم الناي  
في ايديك القهوة  
وفي ايدي الشاي  
ورسمنا الذكرى  
بفلاش الكاميرا  
للعمر الجاي

"حلم عابر"

كنتي نهر من دموعي  
كنتي اقرب م الوريد  
وانقطع صوت البلابل  
واختفى طيفك بعيد  
مين يصدق حلم عابر  
كان في يوم رؤية وعيد  
لما خونتي قلبي خانك  
والشموع صارت تقيد  
بعد ما كانت في عيدك  
تحبي عيدك المجيد  
انتي مجدك حب زائل  
والملوك صارت عبيد  
كنتي نهر من دموعي  
وانقطع حبل الوريد

## "غزة الشهيدة"

يا شاهدة ع النضال  
يا شاهدة ع الحكاوي  
من طفل في الحصار  
قصة عن قنابل  
وقصة عن كبار  
وقصة عن مآذن  
كانت لك المنار  
دكتها القنابل  
ودم من بعيد  
سال ع الجدار  
شاهدة يا حكاوي  
على طفل كان رضيع  
دمعه كان بيشكي  
من برد في الصقيع  
من جوع  
من فراق  
أمه ليه تضيع  
شاهدة يا حكاوي  
والف مرة شاهدة

عن حب كان يداوي

وصحبة القهاوي

وشاعر بس هاوي

ماتوا مرة واحدة

وعاش الف راوي

وغزة لسه صامدة

تاج ع المدائن

وشاهدة ع النضال